

# RANG UNDANG-UNDANG (draf ke-4, 8 November 2023)

*tajuk*

Menyediakan peraturan bagi pengawalseliaan pendanaan awam dan swasta parti politik, mewujudkan kesalahan dan menetapkan penalti dan denda pentadbiran bagi apa-apa pelanggaran, dan menyediakan peruntukan bagi perkara yang berkaitan.

[ ]

DIGUBAL oleh Parlimen Malaysia seperti yang berikut:

## **BAHAGIAN I - PENDAHULUAN**

### **1. Tajuk Ringkas dan permulaan**

- (1) Akta ini boleh disebut sebagai Akta Pendanaan Politik 2023.
- (2) Akta ini mula berkuat kuasa pada tarikh yang akan ditetapkan oleh Menteri melalui pemberitahuan dalam *Warta* dan Menteri boleh menetapkan tarikh yang berlainan untuk menguatkuasakan Bahagian atau peruntukan yang berlainan dalam Akta ini.

### **2. Objektif Akta**

(1) Objektif Akta ini adalah:

- (a) untuk menyediakan dan mengawal selia pendanaan awam dan swasta parti politik;
- (b) untuk menyediakan peruntukan bagi penubuhan dan pengurusan dana untuk membiayai aktiviti parti politik;
- (c) untuk melarang derma tertentu yang diberikan secara langsung kepada parti politik;
- (d) untuk menghendaki dan mengawal selia pendedahan penuh dan jujur tentang semua derma yang diterima oleh atau bagi pihak, parti politik;
- (e) untuk menjelaskan dan menentukan tugas parti politik berhubung dengan penerimaan, penggunaan, dan pelaporan pendanaan awam dan swasta; dan



- (f) untuk menubuhkan dan memperuntukkan kuasa dan tugas Suruhanjaya, yang akan dikendalikan secara bebas daripada kerajaan, yang akan mengawasi pengagihan dan penggunaan dana awam dengan adil dan saksama.
- (2) Dalam pelaksanaan peruntukan Akta ini, semua pihak hendaklah mengutamakan dan memaksimumkan:
- (a) pengagihan pendanaan yang adil dan saksama, berdasarkan piawai antarabangsa yang boleh diterima, bertujuan mengukuhkan demokrasi berperwakilan di Malaysia;
- (b) keterbukaan, ketelusan, akauntabiliti dan pendedahan kepada orang awam; dan
- (c) penuh percaya mutlak dan kebenaran dalam apa-apa pendedahan atau pengisytiharan yang mereka mungkin dikehendaki melakukannya, tanpa tujuan pengelakan.

### 3. Tafsiran

Dalam Akta ini, melainkan jika konteks menetapkan sebaliknya –

"**derma rahsia**" bermaksud apa-apa derma yang nama pendermanya tidak diketahui oleh parti politik yang menerima derma tersebut.

"**Derma tunai**" bermaksud apa-apa derma kepada parti politik dalam bentuk mata wang kertas dan mata wang syiling. "Mata wang kertas" dan "mata wang syiling" ditakrifkan oleh Akta Mata Wang 2020.

"**CEO**" merujuk Ketua Pegawai Eksekutif Dana Parti Politik, yang dilantik oleh Suruhanjaya di bawah seksyen 24(10)(a) Akta ini.

"**Suruhanjaya**" merujuk Suruhanjaya Pendanaan Politik seperti yang ditetapkan oleh subseksyen 21(1) Akta ini.

"**Jawatankuasa**" merujuk Jawatankuasa Parlimen bagi Pendanaan Politik yang ditetapkan oleh subseksyen 20(1) Akta ini.

"**Pengerusi**" merujuk Pengerusi Suruhanjaya.

"**hari penentuan**" bermaksud hari terakhir bulan Januari setiap tahun;

"**derma**" berhubung dengan parti politik bermaksud apa-apa hadiah wang atau harta kepada parti politik dan termasuk "**derma berbentuk manfaat**" yang –

(a) termasuk -

- (i) apa-apa wang yang dipinjamkan kepada parti politik selain syarat perdagangan;
- (ii) apa-apa wang yang dibayar bagi pihak parti politik untuk apa-apa perbelanjaan yang ditanggung secara langsung atau tidak langsung oleh parti politik itu;
- (iii) penyediaan aset, perkhidmatan atau kemudahan untuk kegunaan atau manfaat parti politik selain syarat perdagangan tetapi termasuk situasi apabila penderma menjual item atau perkhidmatan kepada parti politik dengan harga kurang daripada harga pasaran, dan dalam kes sedemikian, derma dalam bentuk barangan ialah jumlah diskaun; atau
- (iv) pemberian apa-apa tajaan berhubung dengan parti politik, yang diberikan, dibelanjakan, dipinjamkan atau disediakan untuk parti politik; tetapi

(b) tidak termasuk perkhidmatan yang diberikan secara peribadi oleh sukarelawan;

"**tempoh kempen**" tempoh apabila mana-mana calon atau ejen pilihan rayanya



dibenarkan untuk mengadakan kempen pilihan raya di kawasan pilihan raya calon, iaitu tempoh bermula dari masa pegawai pengurus pilihan raya mengisytiharkan bahawa pengundian akan diadakan dalam kawasan pilihan raya yang beliau dilantik dan tamat apabila berakhirnya hari sebelum hari mengundi;

**"Calon pilihan raya"** bermaksud calon pilihan raya yang telah didaftarkan oleh Suruhanjaya Pilihan Raya;

**"Menteri"** bermaksud Menteri yang diberikan tanggungjawab undang-undang;

**"ibu pejabat kebangsaan"** ialah ibu pejabat pusat bagi parti politik di Malaysia

**"ibu pejabat negeri"** ialah cawangan negeri bagi parti politik yang menguruskan cawangan tempatannya di negeri di Malaysia;

**"pindahan derma"** bermaksud apa-apa derma yang diberikan melalui pindahan bank;

**"cawangan tempatan"** bermaksud cawangan parti politik di setiap kawasan pilihan raya sesebuah negeri di Malaysia;

**"entiti"** merangkumi orang, syarikat, persatuan dan organisasi;

**"tahun kewangan"** bermaksud tempoh perakaunan bagi tahun yang berakhir pada 31 Disember setiap tahun;

**"kerajaan asing"** bermaksud kerajaan negara asing;

**"Dana"** bermaksud Dana Parti Politik seperti yang ditetapkan oleh subseksyen 10(1) Akta ini;

**"entiti berkaitan kerajaan (GLE)"** merujuk mana-mana entiti yang Kerajaan Malaysia (Kerajaan Persekutuan atau Kerajaan Negeri) mempunyai pemegangan syer substantial yang dipegang olehnya sendiri atau melalui mana-mana badan berkanun (yang termasuk badan berkanun negeri atau perbadanan negeri) dan anak syarikat (seperti yang ditakrifkan oleh Akta Syarikat 2016) entiti tersebut;

**"pemegangan syer substantial"** ditakrifkan oleh seksyen 136 Akta Syarikat 2016;

**"Jenayah terancang"** bermaksud sekumpulan dua orang atau lebih, yang bertindak bersama-sama dengan tujuan melakukan satu kesalahan yang serius atau lebih, untuk mendapatkan, secara langsung atau tidak langsung, manfaat material, kuasa atau pengaruh;

**"Syarikat yang dikawal oleh Malaysia"** ialah syarikat yang bukan syarikat asing seperti yang ditakrifkan dalam s2(1) Akta Syarikat 2016 (Akta 777);

**"Pilihan raya Parlimen"** bermaksud pemilihan ahli Dewan Rakyat apabila writ pilihan raya dikeluarkan di semua kawasan Parlimen;

**"pendanaan politik"** merujuk aktiviti mendapatkan dana untuk perbelanjaan yang ditanggung semasa aktiviti parti dan untuk mengekalkan jentera parti. Aktiviti ini termasuk pengumpulan dana, kos penyelenggaraan pejabat tetap, menjalankan penyelidikan dasar, menjalankan tinjauan dan pendidikan politik, mengadakan kempen pengiklanan untuk dasar, dan menggerakkan pengundi;

**"parti politik"** merujuk parti politik seperti yang ditakrifkan dalam seksyen 2 Akta Pertubuhan 1966 (Akta 335);

«Wilayah» dibahagikan kepada yang berikut –

- (a) Semenanjung Malaysia;
- (b) Sarawak; dan
- (c) Sabah dan Wilayah Persekutuan Labuan

**"Pilihan raya negeri"** bermaksud pemilihan ahli Dewan Undangan mana-mana Negeri apabila writ pilihan raya dikeluarkan di semua 3erajaa pilihan raya Negeri;

**"jumlah undi yang sah"** bermaksud jumlah undi yang dikira selain undi yang ditolak; dan

**"wakil wanita terpilih"** bermaksud wanita yang dipilih sebagai ahli Dewan Rakyat atau Dewan Undangan mana-mana Negeri.



## BAHAGIAN II – MENGAWAL SELIA DERMA SWASTA

### **4. Penderma dan Penerima yang Dibenarkan**

- (1) Derma hanya boleh diterima oleh parti politik atau calon pilihan raya.
- (2) Derma yang diterima oleh parti politik atau calon pilihan raya boleh diterima jika-
  - (a) orang yang olehnya derma itu akan diberikan ialah, pada masa penerimaannya, seorang penderma yang dibenarkan; dan
  - (b) parti politik atau calon pilihan raya dapat memastikan identiti penderma, dengan pengecualian s8.
- (3) Bagi maksud subseksyen (2), penderma yang dibenarkan ialah-
  - (a) individu yang merupakan warganegara Malaysia dan berumur tidak kurang daripada 18 tahun;
  - (b) entiti yang didaftarkan di bawah Akta Pertubuhan 1966; atau
  - (c) syarikat yang dikawal oleh Malaysia.

### **5. Derma yang dilarang**

- (1) Parti politik dan calon pilihan raya tidak boleh menerima derma daripada mana-mana sumber yang berikut:
  - (a) Kerajaan asing atau agensi kerajaan asing;
  - (b) Tertakluk kepada subseksyen (5), orang asing atau entiti asing;
  - (c) Entiti berkaitan kerajaan;
  - (d) Kumpulan jenayah terancang;
  - (e) Entiti yang ditubuhkan untuk tujuan amal;
  - (f) Persatuan agama;
  - (g) Entiti yang telah menandatangani kontrak perolehan kerajaan bagi jumlah yang akan ditetapkan oleh Suruhanjaya atau kontrak pelaburan pembinaan awam yang ditetapkan oleh Suruhanjaya dan sedang melaksanakan kontrak tersebut;
  - (h) Perniagaan atau yayasan yang dikendalikan atau dilaburkan oleh parti politik.
- (2) Bagi maksud Akta ini, seseorang individu tidak boleh menderma untuk atau bagi pihak mana-mana orang lain.
- (3) Parti politik atau calon pilihan raya tidak boleh menerima derma yang diketahui atau



semunasabahnya patut tahu, atau disyaki, berpunca daripada hasil jenayah dan mestilah melaporkan maklumat atau syak wasangka itu kepada Suruhanjaya dan Suruhanjaya hendaklah mengambil langkah yang sewajarnya untuk merujuk perkara itu kepada pihak berkuasa penguatkuasaan undang-undang yang berkaitan.

(4) Tertakluk kepada Akta ini, tiada apa-apa dalam perenggan (1)(b) yang menghalang parti politik atau calon pilihan raya daripada menerima derma daripada entiti asing untuk tujuan-

(a) latihan atau pembangunan kemahiran ahli parti politik; atau

(b) pembangunan dasar oleh parti politik.

#### **6. Derma dalam bentuk manfaat**

(1) Bagi tujuan derma dalam bentuk manfaat, parti politik dan calon pilihan raya hanya boleh menerima derma dalam nilai yang tidak melebihi nilai yang ditetapkan oleh Suruhanjaya.

(2) Nilai derma yang berbentuk hadiah kepada parti politik atau calon pilihan raya ialah nilai pasaran harta yang berkenaan.

(3) Sekiranya apa-apa derma, sama ada wang, saham atau harta, dipindahkan kepada parti politik atau calon pilihan raya, untuk pertimbangan yang kurang daripada nilai wang atau nilai pasaran harta itu, nilai derma dianggap sebagai perbezaan antara-

(a) nilai wang, atau nilai pasaran harta, yang berkenaan; dengan

(b) pertimbangan yang diberikan oleh atau bagi pihak parti politik atau calon pilihan raya, mengikut mana-mana yang berkenaan.

(4) Parti politik atau calon pilihan raya dikehendaki membuktikan nilai apa-apa derma yang bukan derma tunai kepada Suruhanjaya dengan menyediakan dokumen sokongan seperti yang ditentukan oleh Suruhanjaya di bawah seksyen 24 Akta ini.

(5) Apabila menerima derma dalam bentuk manfaat, parti politik atau calon pilihan raya hendaklah-

(a) menyimpan rekod apa-apa pindahan derma yang diterima; dan

(b) mendedahkan kepada Suruhanjaya rekod pindahan derma yang diterima oleh parti politik atau calon pilihan raya mengikut cara yang ditetapkan oleh Suruhanjaya.

#### **7. Pindahan derma**

(1) Bagi tujuan pindahan derma, parti politik atau calon pilihan raya tidak boleh menerima;

(a) daripada seseorang melebihi Lima Puluh Ribu Ringgit (RM 50,000.00);

(b) daripada syarikat melebihi Seratus Ribu Ringgit (RM 100,000.00);



- (c) daripada kumpulan syarikat melebihi Lima Ratus Ribu Ringgit (RM500,000.00) atau
- (d) apa-apa jumlah yang akan ditetapkan oleh Suruhanjaya.
- (2) Parti politik tidak boleh menerima derma rahsia melebihi 30% daripada jumlah derma yang diterima oleh parti politik itu pada tahun tersebut, apa-apa lebihan akan dipindahkan kepada Suruhanjaya, mengikut s 22(4) Akta ini.
- (3) Semua derma yang diberikan oleh orang atau syarikat, mengikut mana-mana yang berkenaan, kepada parti politik atau calon pilihan raya pada tahun laporan atau pulangan berkaitan hendaklah diagregatkan dan dianggap sebagai satu derma.
- (4) Apabila menerima pindahan derma, parti politik atau calon pilihan raya hendaklah-
- (a) menyimpan rekod apa-apa pindahan derma yang diterima; dan
- (b) mendedahkan kepada Suruhanjaya rekod pindahan derma yang diterima oleh parti politik atau calon pilihan raya mengikut cara yang ditetapkan oleh Suruhanjaya.

#### **8. Derma tunai**

- (1) Tertakluk kepada subseksyen (2), (3), dan (4), parti politik atau calon pilihan raya tidak boleh menerima derma tunai.
- (2) Walau apa pun subseksyen (1), parti politik atau calon pilihan raya hanya boleh menerima derma tunai semasa ceramah politik atau acara yang serupa.
- (3) Apabila menerima derma semasa ceramah politik atau acara yang serupa, parti politik atau calon pilihan raya hendaklah:
- (a) menyimpan rekod apa-apa derma yang diterima dan rekod itu hendaklah disediakan untuk Suruhanjaya; dan
- (b) mendedahkan kepada Suruhanjaya semua derma tunai dalam tempoh 3 hari bekerja selepas berakhirnya ceramah politik atau acara lain yang serupa.
- (4) Derma yang diterima semasa ceramah politik, acara pengumpulan dana atau acara yang serupa tidak boleh diterima oleh parti politik atau calon pilihan raya jika derma tersebut melebihi Satu Ribu Ringgit (RM 1,000.00).
- (5) Butiran rekod derma dalam subseksyen (3) hendaklah ditetapkan oleh Suruhanjaya dalam peraturan.

#### **9. Derma kepada calon pilihan raya**

- (1) Tiada seorang pun boleh memberikan derma kepada calon pilihan raya selain semasa tempoh kempen pilihan raya.
- (2) Calon pilihan raya dikehendaki membuka akaun yang ditetapkan untuk menerima derma dan derma yang diterima tidak boleh dibayar ke dalam akaun simpanan peribadi calon pilihan raya.
- (3) Tertakluk kepada peruntukan Akta ini, calon pilihan raya hendaklah, dalam tempoh



31 hari selepas berakhirnya tempoh kempen pilihan raya, menyediakan dan menghantar kepada Suruhanjaya, laporan derma di bawah seksyen ini berhubung dengan setiap derma yang boleh direkodkan, memberikan semua butiran berhubung dengan setiap penderma yang dikehendaki oleh Akta ini.

- (4) Peruntukan Akta ini terpakai kepada semua derma yang diberikan kepada calon pilihan raya dan tidak boleh memintas Akta ini.

## **10. Penalti kerana Melanggar Bahagian II**

Mana-mana orang atau parti politik yang melanggar Bahagian ini atau memberikan maklumat palsu kepada Suruhanjaya, telah melakukan kesalahan yang boleh dikenakan denda tidak melebihi 10 kali ganda jumlah derma yang dilarang dan derma yang dilarang itu akan dilucut hak.

## **BAHAGIAN III – PENUBUHAN DAN PENGURUSAN DANA PARTI POLITIK**

### **11. Penubuhan Dana Parti Politik**

- (1) Dana Parti Politik dengan ini ditubuhkan bertujuan meningkatkan demokrasi Berparlimen dengan menyediakan pendanaan untuk parti politik.
- (2) Suruhanjaya mestilah membuka akaun untuk Dana dengan mana-mana bank berlesen di bawah Akta Perkhidmatan Kewangan 2013 (Akta 758) atau mana-mana bank Islam berlesen di bawah Akta Perkhidmatan Kewangan Islam 2013 (Akta 759).
- (3) Suruhanjaya mestilah mengkreditkan akaun yang diperuntukkan dalam subseksyen (2) dengan-
- (a) wang yang diperuntukkan oleh Parlimen;
  - (b) dana yang disediakan oleh sumber swasta yang layak sebagai penderma yang dibenarkan; dan
  - (c) faedah yang diperoleh daripada wang tersebut.

### **12. Pengurusan dan Pentadbiran Dana**

- (1) CEO seperti yang dilantik di bawah perenggan 24(10)(a) oleh Suruhanjaya, bertanggungjawab ke atas pengurusan dan pentadbiran Dana dan hendaklah menyediakan laporan tahunan yang akan dikemukakan kepada Suruhanjaya.
- (2) Bagi setiap tahun kewangan, CEO mestilah menyimpan rekod mengikut piawaian amalan perakaunan yang diiktiraf secara umum berhubung dengan setiap Dana, yang menyatakan-
- (a) semua wang yang diterima atau terakru dalam Dana;
  - (b) semua peruntukan dan bayaran yang dibuat;
  - (c) semua perbelanjaan yang timbul daripada peruntukan wang daripada Dana; dan



- (d) rekod semasa modal dan liabiliti Dana sepanjang tahun tersebut.
- (3) CEO hendaklah, membawa ke tahun kewangan yang berikutnya apa-apa wang yang ada dalam kredit Dana pada akhir tahun kewangan sebagai baki kredit.

### 13. Peruntukan Dana

- (1) Jumlah peruntukan yang boleh dibayar kepada parti politik yang layak adalah Seratus Tiga Puluh Juta Ringgit (RM 130,000,000.00) setahun.
- (2) Jumlah peruntukan di bawah subseksyen (1) Akta ini hendaklah dibahagikan kepada yang berikut: —
- (a) Seratus Dua Puluh Juta Ringgit (RM120,000,000.00) hendaklah diagihkan berdasarkan undi yang diperolehi oleh parti politik yang layak dalam pilihan raya Parlimen dan pilihan raya Negeri dalam pilihan raya yang terakhir diadakan; dan
- (b) Sepuluh Juta Ringgit (RM10,000,000.00) hendaklah diagihkan secara berkadar berdasarkan bilangan wakil wanita yang dipilih daripada parti politik yang layak.
- (3) Jumlah peruntukan di bawah perenggan (2)(a) Akta ini hendaklah seterusnya dibahagikan berdasarkan Wilayah, iaitu —
- (a) sejumlah Sembilan Puluh Juta Ringgit (RM 90,000,000.00) untuk parti politik yang layak di Semenanjung Malaysia;
- (b) sejumlah Lima Belas Juta Ringgit (RM15,000,000.00) untuk parti politik yang layak di Sabah dan Wilayah Persekutuan Labuan; dan
- (c) sejumlah Lima Belas Juta Ringgit (RM15,000,000.00) untuk parti politik yang layak di Sarawak.
- (4) Jumlah yang dinyatakan dalam perenggan (3)(a), (b) dan (c) hendaklah disemak oleh Suruhanjaya dan semakan hendaklah dilaporkan kepada Jawatankuasa setiap lima tahun sekali dan boleh, atas syor Jawatankuasa, dipinda oleh Rang Undang-Undang yang diluluskan oleh Parlimen.

### 14. Peruntukan berdasarkan syer undi

- (1) Parti politik layak menerima wang yang diagihkan di bawah peruntukan yang dinyatakan dalam perenggan 13(2)(a) jika, pada hari penentuan, parti —
- (a) memperoleh sekurang-kurangnya dua peratus (2%) daripada jumlah undi sah yang dibuang dalam pilihan raya Parlimen yang terakhir diadakan di mana-mana Wilayah, atau dalam pilihan raya Negeri yang terakhir diadakan di mana-mana Negeri, mengikut mana-mana yang berkenaan;
- (b) mempunyai sekurang-kurangnya satu kerusi Dewan Undangan Negeri; atau
- (c) mempunyai sekurang-kurangnya satu kerusi Parlimen.
- (2) Suruhanjaya hendaklah terlebih dahulu memastikan —



- (a) bilangan undi yang diperoleh oleh setiap parti politik dalam pilihan raya Parlimen dan pilihan raya Negeri yang terakhir diadakan pada hari penentuan; dan
- (b) jumlah undi sah bagi pilihan raya Parlimen dan pilihan raya Negeri yang terakhir diadakan pada hari penentuan, mengikut Wilayah dan Negeri,

dan seterusnya, mengenal pasti parti politik yang layak menerima wang yang diagihkan mengikut asas yang ditetapkan di bawah subseksyen (1).

(3) Jumlah peruntukan di bawah subseksyen 12(3) Akta ini bagi setiap Wilayah hendaklah seterusnya dibahagikan kepada —

- (a) separuh daripada jumlah itu hendaklah diagihkan berdasarkan undi parti politik yang diperoleh dalam pilihan raya Parlimen dan dikreditkan ke dalam akaun rasmi ibu pejabat kebangsaan bagi parti yang layak; dan
- (b) separuh daripada jumlah itu hendaklah diagihkan berdasarkan undi parti politik yang diperoleh dalam pilihan raya Negeri dan dikreditkan ke dalam akaun rasmi ibu pejabat negeri parti yang layak.

(4) Ibu pejabat kebangsaan parti politik akan menerima jumlah tahunan berdasarkan formula seperti yang ditetapkan dalam Jadual 1.

(5) Ibu pejabat negeri parti politik akan menerima jumlah tahunan berdasarkan kaedah seperti yang diperuntukkan dalam Jadual 2.

#### **15. Peruntukan untuk menggalakkan perwakilan wanita**

- (1) Parti politik layak menerima wang yang diagihkan di bawah peruntukan yang ditetapkan dalam perenggan 13(2)(b) jika terdapat sekurang-kurangnya seorang wakil wanita terpilih yang mewakili parti itu pada hari penentuan.
- (2) Bagi tujuan menentukan gabungan parti politik bagi wakil wanita yang dipilih di bawah subseksyen (1), ia hendaklah gabungan partinya pada hari membuang undi untuk pilihan raya yang dia terakhir sekali terpilih sebagai wakil wanita yang dipilih.
- (3) Suruhanjaya hendaklah terlebih dahulu memastikan bilangan wakil wanita yang dipilih bagi setiap parti politik yang layak pada hari penentuan.
- (4) Bagi maksud subseksyen (1) Akta ini, ia hendaklah dikira sebagai satu walaupun seseorang itu ialah ahli Dewan Rakyat dan ahli Dewan Undangan mana-mana Negeri pada hari penentuan.
- (5) Parti politik yang layak akan menerima jumlah tahunan berdasarkan formula seperti yang diperuntukkan dalam Jadual 3.

#### **16. Perbelanjaan untuk penyelidikan pembangunan dasar**

- (1) Parti politik hendaklah membelanjakan sekurang-kurangnya satu perempat daripada wang yang diterima di bawah Bahagian ini untuk penyelidikan pembangunan dasar setiap tahun.



- (2) Suruhanjaya boleh membuat peraturan untuk menetapkan perbelanjaan yang boleh dianggap sebagai perbelanjaan untuk penyelidikan pembangunan dasar, dan menyediakan keperluan dan prosedur pelaporan bagi perbelanjaannya untuk penyelidikan pembangunan dasar.
- (3) Sekiranya parti politik gagal menunjukkan kepada Suruhanjaya bahawa ia telah membelanjakan jumlah seperti yang dikehendaki di bawah subseksyen (1) dalam tahun kalendar sebelumnya, Suruhanjaya hendaklah menolak wang yang perlu dibayar kepada parti tersebut pada tahun kalendar semasa, jumlah tertentu iaitu perbezaan antara jumlah yang diperlukan di bawah subseksyen (1) dengan jumlah yang dibelanjakan dan ditunjukkan kepada Suruhanjaya untuk penyelidikan pembangunan dasar. Sekiranya parti tersebut tidak layak menerima wang yang perlu dibayar di bawah subseksyen (1) pada tahun kalendar semasa, Suruhanjaya hendaklah meminta parti tersebut membayar balik jumlah tertentu itu kepada Dana.

## 17. Parti Politik

- (1) Bagi tujuan menjalankan penentuan wang yang perlu dibayar dan membayar wang tertentu kepada parti politik di bawah Bahagian ini, melainkan jika Suruhanjaya dimaklumkan sebaliknya, pengenalan parti politik hendaklah berdasarkan simbol parti yang digunakan dalam pilihan raya.
- (2) Parti politik yang telah bertanding dalam pilihan raya sebagai gabungan dengan menggunakan simbol parti yang sama hendaklah memaklumkan kepada Suruhanjaya mengikut bentuk dan cara sebagaimana yang ditetapkan oleh Suruhanjaya melalui peraturan bahawa semua parti tersebut perlu dikenal pasti secara berasingan berdasarkan parti komponen jika semua parti dalam gabungan itu berhasrat dan bersetuju untuk berbuat demikian.
- (3) Jika parti politik dibubarkan, dibatalkan pendaftaran atau atas apa jua sebab terhenti kewujudannya, ia hendaklah, dari tarikh pembubaran, pembatalan pendaftaran atau pemberhentiannya, tidak lagi layak untuk menerima wang di bawah Bahagian ini.
- (4) Walau apa pun subseksyen (1) —
  - (a) dalam kes pembubaran, pembatalan pendaftaran atau pemberhentian parti politik yang merupakan gabungan berdaftar yang terdiri daripada dua parti komponen atau lebih, pembubaran, pembatalan pendaftaran atau pemberhentian tersebut tidak akan menjejaskan kelayakan parti komponen untuk menerima wang di bawah Bahagian ini jika ia telah memaklumkan kepada Suruhanjaya menurut subseksyen (2); dan
  - (b) jika parti politik yang layak terhenti kewujudannya oleh sebab penggabungan dengan parti politik lain, wang yang perlu dibayar kepada parti yang layak hendaklah dibayar kepada, dan kelayakannya untuk menerima wang di bawah Bahagian ini hendaklah dipindahkan kepada, parti baharu yang dibentuk melalui penggabungan tersebut.



## **18. Tujuan yang menyebabkan wang daripada Dana boleh digunakan**

- (1) Tertakluk kepada Akta ini, wang yang dibayar menurut Akta ini hendaklah digunakan oleh parti politik untuk apa-apa tujuan yang sesuai dengan fungsinya sebagai parti politik dalam demokrasi berparlimen.
- (2) Wang yang dibayar menurut Akta ini tidak boleh digunakan oleh parti politik-
  - (a) secara langsung atau tidak langsung untuk tujuan menubuhkan apa-apa perniagaan, atau memperoleh atau mengekalkan apa-apa hak bagi kepentingan kewangan dalam apa-apa perniagaan, atau dalam apa-apa harta tak alih, kecuali jika hak atau kepentingan dalam harta tak alih itu akan digunakan oleh parti semata-mata untuk tujuan politik parti;
  - (b) untuk membiayai kos undang-undang yang berkaitan dengan pertikaian dalaman parti politik; atau
  - (c) untuk tujuan seperti yang ditetapkan oleh Suruhanjaya.

## **19. Pembayaran wang kepada parti politik**

- (1) Wang yang perlu dibayar kepada parti politik daripada Dana hendaklah dibayar oleh Suruhanjaya pada atau sebelum hari pertama bulan April setiap tahun.
- (2) Bagi tahun kalendar yang Akta ini berkuat kuasa, wang yang perlu dibayar kepada parti politik bagi tahun kalendar itu hendaklah dibayar dalam tempoh tiga bulan dari tarikh Akta ini berkuat kuasa.

## **Bahagian IV - KEPERLUAN PENYIMPANAN REKOD DAN PELAPORAN**

### **20. Keperluan pelaporan bagi parti yang menerima dana daripada Dana Parti Politik**

Parti politik yang telah menerima wang daripada Dana dikehendaki menyerahkan kepada Suruhanjaya rekod terperinci yang diaudit tentang perbelanjaan dan tujuan perbelanjaan wang menjelang akhir setiap tahun kewangan.

### **21. Keperluan pelaporan untuk ibu pejabat negeri parti politik**

- (1) Setiap ibu pejabat negeri hendaklah menyimpan rekod semua derma yang diterima oleh ibu pejabat negeri di negeri tertentu dan hendaklah menyediakan laporan derma ini kepada ibu pejabat kebangsaan parti politik pada akhir setiap tahun kewangan.
- (2) Semua derma hendaklah dibayar ke dalam akaun kewangan ibu pejabat negeri parti politik dan hendaklah diagihkan kepada setiap cawangan tempatan mengikut



kehendak penderma.

- (3) Setiap ibu pejabat negeri parti politik hendaklah mewujudkan mekanisme yang telus untuk memudahkan pindahan derma daripada ibu pejabat negeri kepada cawangan tempatan.
- (4) Pada akhir setiap tahun kewangan, setiap ibu pejabat negeri parti politik hendaklah mengemukakan penyata kewangan dan akaun kewangan teraudit kepada ibu pejabat kebangsaan parti politik.
- (5) Ibu pejabat kebangsaan hendaklah mengumpulkan laporan bagi semua ibu pejabat negeri dan menyerahkan penyata kewangan dan akaun kewangan teraudit kepada Suruhanjaya.

## **22. Keperluan pelaporan untuk parti politik kebangsaan yang menerima derma**

- (1) Tertakluk kepada peruntukan Akta ini, Bendahari parti politik, dalam tempoh 31 hari selepas penutupan setiap tahun kewangan parti politik, menyediakan dan menghantar kepada Suruhanjaya laporan derma di bawah seksyen ini berhubung dengan setiap derma yang boleh direkodkan, memberikan semua butiran berhubung dengan setiap penderma yang ditetapkan dalam Jadual 4.
- (2) Setiap derma daripada penderma yang dibenarkan kepada parti politik yang diterima semasa tahun kewangannya dan diluluskan oleh parti politik mestilah direkodkan dalam laporan derma di bawah seksyen ini untuk tahun kewangan tersebut-
  - (a) jika ia derma tunggal lebih daripada Satu Ribu Ringgit (RM 1,000.00) atau apa-apa jumlah lain yang ditetapkan; atau
  - (b) jika, apabila ia ditambah kepada mana-mana derma lain daripada penderma yang dibenarkan yang sama, jumlah agregat derma lebih daripada Satu Ribu Ringgit (RM 1,000.00), atau apa-apa jumlah lain yang ditetapkan.
- (3) Jika dalam mana-mana tahun kewangan, tiada derma diterima oleh parti politik yang, menurut kuasa peruntukan seksyen ini, dikehendaki direkodkan dalam laporan derma untuk tahun kewangan tersebut, laporan derma itu mestilah mengandungi penyata tentang perkara tersebut.
- (4) Tertakluk kepada peruntukan Akta ini, apabila derma yang diterima oleh parti politik atau calon pilihan raya bertentangan dengan peruntukan Akta ini, perkara berikut perlu dipatuhi dengan segera atau tidak lewat daripada masa penyerahan penyata akaun bagi tahun yang berkenaan:
  - (a) jika derma itu dihantar oleh seseorang dan identiti orang itu jelas, keseluruhan derma mestilah dikembalikan kepada orang itu;
  - (b) jika perenggan (a) tidak terpakai tetapi jelas bahawa penderma telah, berhubung dengan derma, menggunakan apa-apa kemudahan yang disediakan oleh institusi kewangan yang boleh dikenal pasti, keseluruhan derma mestilah dikembalikan kepada institusi kewangan itu;
  - (c) jika perenggan (a) dan (b) tidak terpakai, keseluruhan derma mestilah dihantar kepada Suruhanjaya.



**BAHAGIAN V – PENUBUHAN JAWATANKUASA PARLIMEN TENTANG  
PENDANAAN POLITIK DAN SURUHANJAYA PENDANAAN POLITIK**

**23. Jawatankuasa Parlimen tentang Pendanaan Politik**

- (1) Hendaklah ada jawatankuasa tetap di Dewan Rakyat yang dikenali sebagai Jawatankuasa Parlimen tentang Pendanaan Politik untuk menjalankan fungsi seperti yang berikut:
  - (a) untuk mencalonkan ahli Suruhanjaya seperti yang dinyatakan dalam s24 (2);
  - (b) mengesyorkan kepada Yang di-Pertuan Agong untuk menyingkirkan ahli Suruhanjaya jika mereka memenuhi kriteria yang dinyatakan dalam s24 (5); dan
  - (c) untuk mempertimbangkan laporan yang dikeluarkan oleh Suruhanjaya di bawah seksyen 29.
- (2) Jawatankuasa hendaklah dilantik pada permulaan setiap Parlimen dan tidak lewat daripada 60 hari selepas bermulanya sesi pertama setiap Parlimen.
- (3) Jawatankuasa hendaklah terdiri daripada tidak kurang daripada 6 ahli dan tidak lebih daripada 12 ahli Dewan Rakyat yang dilantik oleh resolusi Dewan, dan komposisi Jawatankuasa hendaklah mencerminkan keseimbangan antara semua parti politik dalam Dewan, tidak seorang pun daripada mereka akan menjadi ahli pentadbiran.
- (4) Dalam menjalankan fungsinya di bawah subseksyen (1), Jawatankuasa boleh menentukan prosedurnya sendiri, tertakluk kepada peruntukan Peraturan-Peraturan Majlis Mesyuarat Dewan Rakyat dan Akta Majlis Parlimen (Keistimewaan dan Kuasa) 1952.
- (5) Jawatankuasa hendaklah menyediakan laporan tahunan tentang pelaksanaan fungsinya di bawah Akta ini dan membentangkannya kepada Dewan Rakyat secepat yang mungkin.

**24. Suruhanjaya Pendanaan Politik**

- (1) Hendaklah ada Suruhanjaya Pendanaan Politik yang akan menjadi institusi autonomi.
- (2) Suruhanjaya hendaklah dilantik oleh Yang di-Pertuan Agong atas syor Jawatankuasa seperti yang ditetapkan dalam subseksyen 22(1), dan hendaklah terdiri daripada seorang Pengerusi, seorang Timbalan Pengerusi dan lima ahli lain yang berkhidmat selama tempoh 6 tahun dan mereka layak dilantik semula untuk tempoh selanjutnya selama 6 tahun.
- (3) Dalam melantik ahli Suruhanjaya, Yang di-Pertuan Agong hendaklah mengambil kira kepentingan menubuhkan Suruhanjaya yang mengutamakan kepercayaan awam.
- (4) Pengerusi, Timbalan Pengerusi dan lima ahli lain yang berkhidmat dengan Suruhanjaya hendaklah berhenti memegang jawatan apabila mencapai umur enam



puluh enam tahun atau apabila hilang kelayakan di bawah Akta ini dan boleh pada bila-bila masa meletakkan jawatannya dengan menulis sendiri surat yang bertandatangan yang dialamatkan kepada Yang di-Pertuan Agong, tetapi tidak boleh disingkirkan daripada jawatan kecuali atas alasan yang sama dan mengikut cara yang sama dengan penyingkiran hakim Mahkamah Persekutuan.

- (5) Walau apa pun dalam subseksyen (4), Yang di-Pertuan Agong atas syor Jawatankuasa hendaklah melalui perintah menyingkirkan daripada jawatan mana-mana ahli Suruhanjaya jika ahli tersebut-
- (a) muflis yang belum dilepaskan;
  - (b) terlibat dalam mana-mana jawatan atau pekerjaan berbayar yang di luar daripada tugas jawatan ini; atau
  - (c) ialah ahli Dewan Parlimen atau Dewan Undangan Negeri.
- (6) Selain apa-apa kehilangan kelayakan yang diperuntukkan di bawah subseksyen (5), Pengerusi, Timbalan Pengerusi dan lima ahli lain yang berkhidmat dengan Suruhanjaya akan hilang kelayakan daripada memegang jawatan tersebut jika selepas tiga bulan selepas pelantikan ke jawatan tersebut atau pada bila-bila masa selepas itu dia ialah atau menjadi ahli mana-mana lembaga pengarah atau lembaga pengurusan, atau pegawai atau pekerja, atau terlibat dalam hal ehwal atau perniagaan, mana-mana organisasi atau badan, sama ada korporat atau sebaliknya, atau dalam mana-mana perdagangan, perindustrian atau perusahaan lain, sama ada dia menerima apa-apa imbuhan, ganjaran, keuntungan atau manfaat daripadanya atau tidak.
- (7) Subseksyen (6) tidak terpakai apabila organisasi atau badan tersebut menjalankan apa-apa kerja kebajikan atau kerja sukarela atau objektif yang bermanfaat kepada komuniti atau mana-mana bahagiannya, atau apa-apa kerja atau objektif lain yang berbentuk amal atau sosial, dan ahli tidak menerima apa-apa imbuhan, ganjaran, keuntungan atau manfaat daripadanya.
- (8) Imbuhan ahli Suruhanjaya akan dicajkan ke dalam Kumpulan Wang Disatukan dan tidak akan dipinda sehingga merugikan ahli Suruhanjaya selepas pelantikannya.
- (9) Apabila, dalam apa-apa tempoh, Pengerusi Suruhanjaya telah diberikan cuti oleh Yang di-Pertuan Agong atau tidak dapat, disebabkan tidak berada dalam Persekutuan, sakit atau apa-apa sebab lain, untuk melaksanakan fungsinya, Timbalan Pengerusi hendaklah melaksanakan fungsi Pengerusi dalam tempoh itu, dan jika Timbalan Pengerusi juga tidak hadir atau tidak dapat melaksanakan fungsi tersebut, seorang ahli Suruhanjaya boleh dilantik oleh Yang di-Pertuan Agong untuk melaksanakan fungsi Pengerusi dalam tempoh itu.
- (10) Dalam menjalankan fungsinya menurut Akta ini -
- (a) Suruhanjaya hendaklah melantik orang yang benar-benar berkelayakan dan berpengalaman sebagai Ketua Pegawai Eksekutif bagi Dana;
  - (b) Suruhanjaya boleh melantik pegawai lain untuk membantu ahli Suruhanjaya; dan
  - (c) Suruhanjaya boleh menubuhkan unit berasingan dalam Suruhanjaya untuk



melaksanakan kuasa yang diberikan kepada, menjalankan fungsi yang diberikan kepada dan tugas yang dikenakan ke atas, Suruhanjaya berhubung dengan Akta ini.

## **BAHAGIAN VI – KUASA DAN TUGAS SURUHANJAYA PENDANAAN POLITIK**

### **25. Kuasa Suruhanjaya Pendanaan Politik**

- (1) Suruhanjaya boleh, dalam pelaksanaan fungsi dan tanggungjawab di bawah Akta ini, meminta daripada parti politik apa-apa maklumat yang diperlukan untuk pelaksanaan Akta ini.
- (2) Untuk memantau pematuhan Akta ini atau menyiasat aduan, Suruhanjaya hendaklah mempunyai kuasa untuk:
  - (a) memasuki mana-mana premis pada waktu kerja biasa untuk memeriksa apa-apa buku, rekod, laporan dan dokumen lain yang berkaitan;
  - (b) untuk memulakan penyiasatan terhadap derma atas alasan yang munasabah apabila menerima laporan seperti yang disebutkan dalam perenggan 7(1)(a);
  - (c) menetapkan lampiran dan dokumen sokongan yang diperlukan untuk tujuan subseksyen 5(3); dan
  - (d) menyalin atau menyimpan dalam apa-apa format, apa-apa maklumat, buku, rekod, laporan atau dokumentasi lain yang dihasilkan atau ditemui mengikut syarat.
- (3) Suruhanjaya boleh, mengenakan mana-mana satu hukuman yang berikut atau lebih ke atas penderma dan/atau penerima bagi maksud Akta ini:
  - (a) amaran;
  - (b) denda atau kompaun menurut peruntukan Akta ini; dan
  - (c) pelucuthakan apa-apa derma yang tidak dibenarkan.
- (4) Jika aduan yang berkaitan dengan pendapatan atau perbelanjaan parti politik dikemukakan kepada Suruhanjaya, ia mestilah, jika Suruhanjaya berpandangan bahawa terdapat bahan prima facie bagi aduan tersebut, menyiasat aduan tersebut. Pandangan Suruhanjaya mengenai kewujudan bahan prima facie bagi aduan tertentu mestilah dibuat secara bertulis dan diberikan kepada pengadu dalam tempoh masa dan mengikut prosedur yang ditetapkan oleh Suruhanjaya.

### **26. Kuasa Penyiasatan**

- (1) Suruhanjaya hendaklah, bagi maksud penyiasatan di bawah Akta ini, mempunyai kuasa-
  - (a) untuk menjalankan sidang dengar jika Suruhanjaya menganggap perlu atau wajar untuk berbuat demikian;



- (b) untuk mendapatkan dan menerima semua bukti tertentu, sama ada bertulis atau lisan, dan untuk memeriksa semua orang sebagai saksi apabila Suruhanjaya menganggap perlu atau wajar untuk mendapatkan bukti atau memeriksa orang;
- (c) untuk meminta keterangan, sama ada bertulis atau lisan, bagi mana-mana saksi dibuat atas sumpah atau ikrar (sumpah atau ikrar tersebut adalah yang boleh diminta daripada saksi jika dia memberikan keterangan di mahkamah) atau melalui akuan berkanun;
- (d) untuk memanggil mana-mana orang yang tinggal di Malaysia bagi menghadiri mana-mana mesyuarat atau sidang dengar Suruhanjaya untuk memberikan bukti atau mengemukakan apa-apa dokumen atau perkara lain yang dimilikinya;
- (e) untuk mengeluarkan waran tangkap bagi memaksa kehadiran mana-mana orang yang, selepas dipanggil untuk hadir, gagal berbuat demikian dan tidak memberikan alasan kegagalan tersebut sehingga memuaskan hati Suruhanjaya, dan untuk memerintahkan orang itu membayar semua kos yang mungkin telah dikenakan dalam memaksa kehadirannya atau oleh sebab keengganannya untuk mematuhi saman itu, dan juga untuk mendenda orang itu sejumlah wang menurut Akta ini;
- (f) untuk memberikan mana-mana orang yang telah menghadiri mana-mana mesyuarat atau sidang dengar Suruhanjaya jumlah wang tertentu seperti yang pada pendapat Suruhanjaya mungkin telah ditanggung semunasabahnya oleh orang tersebut oleh sebab kehadiran tersebut; dan
- (g) untuk membenarkan atau mengecualikan orang awam daripada sidang dengar tersebut atau mana-mana bahagiannya.

## **27. Kuasa untuk Membuat Peraturan**

- (1) Dalam melaksanakan tugas dan fungsinya, Suruhanjaya boleh, dengan kelulusan Menteri dan tertakluk kepada subseksyen (2), membuat apa-apa peraturan yang dianggap munasabah dan perlu di bawah Akta ini.
- (2) Mana-mana peraturan di bawah Akta ini tidak boleh dibuat melainkan draf kaedah atau peraturan (mengikut mana-mana yang berkenaan) telah dibentangkan di hadapan dan diluluskan oleh resolusi Dewan Rakyat.

## **28. Semakan atau Rayuan**

- (1) Mana-mana orang boleh memohon kepada Suruhanjaya untuk semakan semula atau rayuan keputusan Suruhanjaya yang dibuat berhubung dengan Akta ini.
- (2) Tertakluk kepada peruntukan Akta ini, mana-mana orang yang tidak berpuas hati dengan apa-apa keputusan Suruhanjaya boleh memohon kepada Hakim untuk semakan semula keputusan itu.



## **29. Pelaporan dan pendedahan**

- (1) Suruhanjaya mestilah bagi setiap tahun kewangan menyediakan dan mengemukakan kepada Jawatankuasa-
  - (a) laporan berkaitan dengan Dana, yang menyatakan-
    - (i) jumlah yang diterima oleh dan terakru dalam Dana;
    - (ii) peruntukan yang diberikan daripada Dana kepada parti politik;
    - (iii) jumlah yang dibelanjakan oleh setiap parti politik berkaitan dengan tujuan di bawah kategori yang ditetapkan; dan
    - (iv) baki dalam setiap Dana dan apa-apa jumlah yang terhutang kepada Dana pada akhir tahun kewangan tersebut;
  - (b) laporan tentang semua derma melebihi RM1,000 yang diberikan kepada parti politik dalam tahun kewangan tersebut.
- (2) Suruhanjaya mestilah bagi setiap tahun kewangan menerbitkan laporan dalam perenggan (1)(a) dan (1) (b) untuk orang awam.
- (3) Walau apa pun subseksyen (1) dan (2), hanya penderma yang dermanya melebihi RM10,000 akan didedahkan kepada orang awam.
- (4) Suruhanjaya hendaklah mengemukakan penyata kewangan tahunannya kepada Ketua Audit Negara dan membentangkannya untuk pengauditan dan Ketua Audit Negara mestilah menerbitkan laporan audit tentang buku dan rekod Suruhanjaya berhubung dengan Dana. Laporan audit hendaklah dibentangkan kepada Parlimen.

## **BAHAGIAN VII – PENGUATKUASAAN**

### **30. Penalti bagi Pelanggaran Akta ini**

- (1) Mana-mana orang mengikut Akta ini yang, dikehendaki oleh Suruhanjaya untuk memberikan keterangan tentang pengesahan atau untuk mengemukakan dokumen atau perkara lain, enggan berbuat demikian dan tidak memberikan alasan bagi keengganan itu sehingga memuaskan hati Suruhanjaya boleh dikenakan denda tidak melebihi Sepuluh Ribu Ringgit (RM 10,000.00) atau tempoh penjara tidak melebihi 6 bulan atau kedua-duanya sekali.
- (2) Walau apa pun peruntukan khas Akta ini, mana-mana orang atau parti politik yang melanggar Akta ini boleh dikenakan denda tidak melebihi Sepuluh Ribu Ringgit (RM 10,000.00) atau tempoh penjara tidak melebihi 6 bulan atau kedua-duanya sekali.

### **31. Liabiliti bagi kesalahan di luar Malaysia**

Peruntukan Akta ini hendaklah, berhubung dengan warganegara, pemastautin tetap Malaysia dan syarikat yang dikawal oleh Malaysia, berkuat kuasa di luar dan juga di Malaysia, dan apabila satu kesalahan di bawah Akta ini dilakukan di mana-mana



tempat di luar Malaysia oleh mana-mana warganegara atau pemastautin tetap atau syarikat yang dikawal oleh Malaysia, warganegara atau pemastautin tetap atau syarikat yang dikawal oleh Malaysia itu boleh diambil tindakan berhubung dengan kesalahan itu seolah-olah ia dilakukan di mana-mana tempat di Malaysia.



## JADUAL 1

*(Bagi maksud seksyen 13 Akta ini)*

Ibu pejabat kebangsaan bagi parti politik hendaklah menerima jumlah tahunan berdasarkan formula yang berikut:

$$Pv0 = \frac{Vp}{TVVp} \times \frac{1}{2} All$$

- Pv0 mewakili jumlah yang layak diterima oleh parti politik di bawah subseksyen ini, yang hendaklah dibundarkan kepada dua tempat perpuluhan yang terdekat;
- Vp mewakili bilangan undi yang diperoleh parti dalam pilihan raya Parlimen yang terakhir diadakan di sesuatu Wilayah;
- TVVp mewakili bilangan jumlah undi sah yang diperoleh oleh semua parti yang layak dalam pilihan raya Parlimen yang terakhir diadakan di Wilayah tersebut; dan
- All mewakili peruntukan bagi Wilayah tersebut yang ditetapkan dalam subseksyen 13(3) Akta ini.



## JADUAL 2

*(Bagi maksud seksyen 14(5) Akta ini)*

Ibu pejabat negeri bagi parti politik hendaklah menerima jumlah tahunan berdasarkan formula yang berikut:

- (a) Suruhanjaya hendaklah terlebih dahulu memastikan bilangan pemilih pada hari penentuan di setiap Negeri;
- (b) Suruhanjaya hendaklah menentukan jumlah peruntukan bagi setiap Negeri berdasarkan formula yang berikut:

$$Als_0 = \frac{Es}{TER} \times \frac{1}{2} All$$

Als<sub>0</sub> Mewakili jumlah peruntukan untuk ibu pejabat negeri, yang hendaklah dibundarkan kepada ribu yang terdekat;

Es mewakili bilangan pemilih bagi Negeri itu seperti yang ditentukan dalam para (a);

TER mewakili bilangan jumlah pemilih bagi Wilayah yang Negeri itu termasuk di dalamnya seperti yang ditentukan dalam para (a); dan

All mewakili peruntukan bagi Wilayah tersebut yang ditetapkan dalam subseksyen 13(3) Akta ini.

dan

- (c) jumlah yang layak diterima oleh parti politik hendaklah ditentukan berdasarkan formula yang berikut:

$$Psv_0 = \frac{Vs}{TV} \times \frac{1}{2} Als_0$$

Psv<sub>0</sub> mewakili jumlah yang layak diterima oleh parti politik di bawah subseksyen ini, yang hendaklah dibundarkan kepada dua tempat perpuluhan yang terdekat;

Vs mewakili bilangan undi yang diperoleh parti dalam pilihan raya Negeri yang terakhir diadakan di Negeri itu; dan



TVVs mewakili bilangan jumlah undi sah yang diperoleh oleh semua parti yang layak dalam pilihan raya Negeri yang terakhir diadakan di Negeri itu.



### JADUAL 3

*(Bagi maksud seksyen 15(5) Akta ini)*

Parti politik yang layak hendaklah menerima jumlah tahunan berdasarkan formula seperti yang diperuntukkan di bawah: -

$$Pw0 = \frac{X}{Y} \times A12$$

- Pw0 mewakili jumlah yang layak diterima oleh parti politik di bawah subseksyen ini, yang hendaklah dibundarkan kepada dua tempat perpuluhan yang terdekat;
- X mewakili bilangan wakil wanita terpilih yang bergabung dengan parti politik pada hari penentuan;
- Y mewakili jumlah wakil wanita yang dipilih daripada semua parti politik pada hari penentuan; dan
- A12 mewakili peruntukan yang ditetapkan dalam perenggan 13(2)(b) Akta ini.



## **JADUAL 4**

*(Bagi maksud seksyen 22(1) Akta ini)*

*Butiran akan diberikan dalam Laporan Derma*

### **Identiti penderma**

1. Laporan derma mestilah menyatakan maklumat yang berikut tentang penderma dan setiap derma yang boleh direkodkan menurut Akta:
  - a) jika individu, laporan hendaklah menyatakan nama penuh, nombor kad pengenalan dan alamat kediamannya pada tarikh penerimaan derma;
  - b) berhubung dengan derma dalam bentuk wasiat, laporan itu hendaklah menyatakan nama penuh dan kad pengenalan penderma yang telah meninggal dunia; dan
  - c) jika syarikat, laporan itu hendaklah menyatakan —
    - i. nama berdaftar syarikat;
    - ii. alamat pejabat berdaftaranya; dan
    - iii. nombor yang syarikat itu didaftarkan.

### **Nilai derma**

2. Jika derma yang direkodkan ialah derma wang (dalam bentuk tunai atau selainnya), laporan derma hendaklah menyatakan jumlah derma, jika tidak, laporan derma hendaklah menyatakan butiran tentang jenis derma dan nilainya yang ditentukan menurut Seksyen 6.

### **Keadaan semasa derma diberikan**

3. Berhubung dengan setiap derma yang boleh direkodkan, laporan derma hendaklah —
  - a) menyatakan sama ada derma itu diberikan kepada persatuan politik atau mana-mana cawangannya atau, jika derma diberikan kepada calon pilihan raya, nama calon pilihan raya itu; dan
  - b) nyatakan tarikh derma diterima.

### **Derma agregat**

4. Berhubung dengan setiap derma yang boleh direkodkan yang diberikan oleh mana-mana orang —
  - a) bagi pihak orang itu dan satu orang lain atau lebih; atau
  - b) bagi pihak satu orang lain atau lebih,

laporan derma hendaklah menyatakan nilai agregat derma serta nilai setiap derma berasingan yang, menurut kuasa Akta, dianggap telah diberikan oleh setiap orang tersebut.



**Butiran lain**

Laporan derma hendaklah menyatakan apa-apa maklumat lain seperti yang ditetapkan oleh peraturan yang dibuat di bawah Seksyen 27.



## HURAIAN

Rang Undang-Undang Pendanaan Politik 2022 yang dicadangkan ("Akta yang dicadangkan") bertujuan menyediakan peruntukan bagi pengawalseliaan pendanaan awam dan swasta parti politik, mewujudkan kesalahan dan menetapkan penalti dan denda pentadbiran bagi apa-apa pelanggaran, dan menyediakan peruntukan bagi perkara yang berkaitan di Malaysia.

### BAHAGIAN I

2. Bahagian I membincangkan perkara permulaan.
3. Fasal 1 mengandungi tajuk ringkas Akta yang dicadangkan.
4. Fasal 2 mengandungi objektif Akta yang dicadangkan dan isu yang ingin dikawal oleh Akta ini.
5. Fasal 3 memperuntukkan pertimbangan umum supaya diambil kira dalam pelaksanaan Akta yang dicadangkan.
6. Fasal 4 mengandungi takrif perkataan dan ungkapan tertentu yang digunakan dalam Akta yang dicadangkan.

### BAHAGIAN II

7. Bahagian II membincangkan peraturan berkaitan derma.
8. Fasal 5 bertujuan memperuntukkan perkara yang dianggap akan membentuk derma.
9. Fasal 6 memperuntukkan cara derma diterima. Fasal 6 menyediakan dua cara derma dianggap diterima, yang pertama apabila parti politik menerima dan menyimpan derma tersebut dan yang kedua apabila derma dimasukkan ke dalam akaun parti politik.
10. Fasal 7 dan Fasal 8 bertujuan mengawal selia derma yang diterima oleh parti politik semasa ceramah politik, acara pengumpulan dana dan acara yang serupa. Fasal 7 memperuntukkan kewajipan parti politik untuk menyimpan rekod derma yang diterima semasa ceramah politik, acara pengumpulan dana dan acara yang serupa, manakala Fasal 8 memperuntukkan had Satu Ribu Ringgit (RM 1,000.00) bagi derma yang diterima oleh parti politik semasa ceramah politik, acara pengumpulan dana dan acara yang serupa.
11. Fasal 9 memperuntukkan larangan derma daripada kerajaan asing dan agensi asing dengan pengecualian seperti yang diperuntukkan dalam Fasal 14.
12. Fasal 10 memperuntukkan had tentang jumlah derma yang boleh diberikan oleh orang, syarikat dan kumpulan syarikat.



13. Fasal 11 memperuntukkan cara menguruskan derma yang diberikan oleh syarikat, kesatuan sekerja, persatuan atau syarikat pembinaan.
14. Fasal 12 memperuntukkan larangan individu menderma bagi pihak orang lain.
15. Fasal 13 melarang parti politik daripada menerima derma yang diketahui atau disyaki oleh parti politik berpunca daripada hasil jenayah dan mengenakan kewajipan kepada parti politik untuk melaporkan perkara tersebut.
16. Fasal 14 memperuntukkan pengecualian bagi Fasal 9 apabila Akta ini tidak boleh dikuatkuasakan dengan cara sedemikian untuk melarang bantuan yang diterima oleh parti politik daripada entiti asing yang berkaitan dengan latihan atau pembangunan kemahiran dan untuk tujuan pembangunan dasar.
17. Fasal 15 memperuntukkan bahawa seseorang hanya boleh memberikan derma kepada ahli parti politik untuk tujuan parti politik manakala Fasal 16 memperuntukkan penganan tanggungjawab kepada ahli parti politik supaya hanya menerima derma yang diperuntukkan dalam Fasal 15.
18. Fasal 17 memperuntukkan bahawa Fasal 15 dan 16 tidak boleh dipintas.
19. Fasal 18 memperuntukkan pelbagai keperluan yang perlu dipenuhi untuk layak menjadi penderma yang dibenarkan menurut Akta yang dicadangkan ini.
20. Fasal 19 memperuntukkan senarai nyata orang dan entiti yang diiktiraf sebagai penderma yang tidak dibenarkan menurut Akta yang dicadangkan ini.
21. Fasal 20 dan 21 memperuntukkan cara nilai derma boleh dipastikan bagi tujuan menguatkuasakan peruntukan Akta yang dicadangkan.
22. Fasal 22 memperuntukkan penalti sekiranya terdapat pelanggaran mana-mana peruntukan dalam Bahagian II.

### BAHAGIAN III

23. Bahagian III membincangkan penubuhan Suruhanjaya Pendanaan Politik.
24. Fasal 23, 24 dan 25 memperuntukkan penubuhan Jawatankuasa Parlimen yang hendaklah dikenali sebagai Jawatankuasa Pendanaan Politik yang hendaklah terdiri daripada tidak kurang daripada 6 ahli dan tidak lebih daripada 12 ahli. Fasal 25 mengenakan kewajipan kepada Jawatankuasa Pendanaan Politik untuk menyediakan laporan tahunan yang akan dibentangkan kepada Dewan Rakyat.
25. Fasal 26 memperuntukkan penubuhan Suruhanjaya Pendanaan Politik bebas.



26. Fasal 27 memperuntukkan komposisi Suruhanjaya Pendanaan Politik, cara mereka dilantik dan bahawa tempoh ahli yang membentuk Suruhanjaya Pendanaan Politik adalah 6 tahun dengan kelayakan pelantikan semula untuk tempoh 6 tahun lagi.
27. Fasal 28 memperuntukkan bahawa dalam melantik ahli yang membentuk Suruhanjaya Pendanaan Politik, perhatian sewajarnya harus diberikan kepada kepentingan menubuhkan Suruhanjaya yang mengutamakan kepercayaan awam.
28. Fasal 29 dan 30 memperuntukkan keadaan apabila ahli yang membentuk Suruhanjaya boleh hilang kelayakan dan penyingkiran ahli mestilah dibuat dengan cara yang sama seperti penyingkiran hakim Mahkamah Persekutuan.
29. Fasal 31 memperuntukkan bahawa ahli yang membentuk Suruhanjaya boleh hilang kelayakan jika selepas tiga bulan selepas pelantikan, ahli tersebut menjadi ahli mana-mana lembaga pengarah atau lembaga pengurusan, pekerja atau terlibat dalam hal ehwal perniagaan mana-mana organisasi.
30. Fasal 32 mengehadkan penggunaan Fasal 31 untuk mengecualikan badan yang menjalankan kerja kebajikan atau kerja sukarela.
31. Fasal 33 mengawal selia imbuhan untuk ahli yang membentuk Suruhanjaya.
32. Fasal 34 memperuntukkan peraturan keadaan apabila Pengerusi atau/dan Timbalan Pengerusi Suruhanjaya telah diberikan cuti oleh Yang di-Pertuan Agong atau tidak dapat, kerana tidak berada di Persekutuan, sakit atau apa-apa sebab lain, untuk melaksanakan fungsinya.
33. Fasal 35 mengawal selia pelantikan dan penubuhan unit berasingan yang boleh dilakukan oleh Suruhanjaya untuk menjalankan fungsinya seperti yang diperuntukkan dalam Akta yang dicadangkan.

#### BAHAGIAN IV

34. Bahagian IV membincangkan penubuhan dan pengurusan Dana Parti Politik.
35. Fasal 36 memperuntukkan bahawa Dana Parti Politik ditubuhkan untuk tujuan meningkatkan demokrasi Berparlimen dengan menyediakan pendanaan parti politik.
36. Fasal 37 memperuntukkan kaedah apabila Suruhanjaya hendak menubuhkan akaun untuk tujuan Dana Parti Politik.
37. Fasal 38 memperuntukkan pelbagai jenis wang dan dana yang akan dikreditkan ke dalam akaun yang diperuntukkan dalam Fasal 37.
38. Fasal 39, 40 dan 41 mengawal selia cara apa-apa wang dalam Dana Parti Politik boleh dilaburkan.
39. Fasal 42 memperuntukkan tanggungjawab Ketua Pegawai Eksekutif yang dilantik menurut peruntukan Akta yang dicadangkan.



40. Fasal 43 mengenakan kewajiban kepada Suruhanjaya untuk menyimpan rekod bagi setiap tahun kewangan. Kandungan rekod yang disimpan juga diperuntukkan dalam Fasal 43.
41. Fasal 44 memperuntukkan jumlah peruntukan yang perlu dibayar kepada parti politik yang layak daripada Dana Parti Politik.
42. Fasal 45 mengawal selia cara apabila jumlah peruntukan yang diperuntukkan dalam Fasal 44 akan dibahagikan dan Fasal 46 mengawal selia jumlah peruntukan yang telah diagihkan berdasarkan undi yang diperoleh oleh parti politik yang layak.
43. Fasal 47 memperuntukkan cara apabila jumlah yang ditetapkan dalam Fasal 44, 45 dan 46 hendak disemak oleh Suruhanjaya.
44. Fasal 48 mengawal selia kelayakan parti politik untuk menerima wang yang diagihkan di bawah peruntukan yang ditetapkan dalam Fasal 45 Akta yang dicadangkan dan Fasal 49 memperuntukkan cara Suruhanjaya hendak memastikan kelayakan parti politik tersebut.
45. Fasal 50 memperuntukkan pembahagian jumlah peruntukan di bawah Fasal 46 kepada separuh daripada jumlah pengagihan berdasarkan undi parti politik yang diperoleh dalam pilihan raya Parlimen dan separuh lagi jumlah yang diagihkan berdasarkan undi parti politik yang diperoleh dalam pilihan raya Negeri.
46. Fasal 51 mengawal selia cara jawatankuasa peringkat kebangsaan atau badan pentadbir parti politik yang layak akan menerima jumlah tahunan seperti yang diperuntukkan dalam Jadual 1 Akta yang dicadangkan.
47. Fasal 52 mengawal selia cara jawatankuasa peringkat negeri atau badan pentadbir parti politik yang layak akan menerima jumlah tahunan seperti yang diperuntukkan dalam Jadual 2 Akta yang dicadangkan.
48. Fasal 53 mengawal selia peruntukan dana untuk menggalakkan perwakilan wanita dan Fasal 54 menetapkan cara gabungan parti politik bagi wakil wanita yang dipilih menurut Fasal 53 hendak ditentukan.
49. Fasal 55 dan Fasal 56 memperuntukkan kaedah untuk menentukan bilangan wakil wanita yang dipilih bagi setiap parti politik yang layak.
50. Fasal 57 memperuntukkan formula yang akan digunakan untuk menentukan peruntukan jumlah tahunan kepada parti politik yang layak. Formula tersebut disediakan dalam Jadual 3 dalam Akta yang dicadangkan.
51. Fasal 58, Fasal 59 dan Fasal 60 memperuntukkan perbelanjaan jumlah wang yang diterima di bawah Bahagian IV Akta yang dicadangkan untuk penyelidikan pembangunan dasar. Fasal 60 mengenakan kewajiban kepada parti politik untuk menunjukkan kepada Suruhanjaya bahawa ia telah membelanjakan jumlah seperti yang dikehendaki di bawah Fasal 58 dan kesannya sekiranya terdapat kegagalan untuk berbuat demikian.



52. Fasal 61 memperuntukkan bahawa melainkan jika Suruhanjaya dimaklumkan sebaliknya, pengenalan parti politik hendaklah berdasarkan simbol parti yang digunakan dalam pilihan raya.
53. Fasal 62 memperuntukkan bahawa parti politik yang telah bertanding dalam pilihan raya sebagai gabungan dengan menggunakan simbol parti yang sama hendaklah memaklukkannya kepada Suruhanjaya.
54. Fasal 63 mengawal selia status kelayakan parti politik yang dibubarkan, dibatalkan pendaftaran atau terhenti kewujudannya manakala Fasal 64 mengawal selia situasi apabila pembubaran, pembatalan pendaftaran atau pemberhentian parti politik tidak akan menjejaskan status kelayakan.
55. Fasal 65 dan Fasal 66 memperuntukkan tujuan wang boleh digunakan daripada Dana Parti Politik. Fasal 66 memperuntukkan tujuan yang dilarang secara nyata apabila wang daripada Dana Parti Politik tidak boleh digunakan untuk tujuan tersebut.
56. Fasal 67 dan Fasal 68 mengawal selia masa bagi wang yang perlu dibayar kepada parti politik daripada Dana Parti Politik yang hendak dibayar oleh Suruhanjaya.

#### **BAHAGIAN V**

57. Bahagian V membincangkan kuasa dan tugas Suruhanjaya Pendanaan Politik untuk tujuan memastikan peruntukan Akta yang dicadangkan dipatuhi.
58. Fasal 69 memperuntukkan bahawa Suruhanjaya boleh menuntut daripada parti politik apa-apa maklumat sebagaimana yang diperlukan untuk pelaksanaan Akta yang dicadangkan.
59. Fasal 70 memperuntukkan bahawa Suruhanjaya mempunyai kuasa untuk memasuki mana-mana premis serta menyalin atau menyimpan apa-apa dokumen atau maklumat untuk tujuan memantau pematuhan Akta yang dicadangkan.
60. Fasal 71 memperuntukkan pelbagai jenis hukuman yang boleh dikenakan oleh Suruhanjaya.
61. Fasal 72 mengawal selia cara Suruhanjaya menangani aduan.
62. Fasal 73 mengenakan liabiliti kepada Bendahari setiap parti politik untuk menyediakan dan menghantar laporan derma kepada Suruhanjaya.
63. Fasal 74 mengawal selia rekod derma untuk tujuan laporan derma dan Fasal 75 mengawal selia keadaan apabila tidak ada derma yang diterima oleh parti politik sepanjang tahun kewangan.
64. Fasal 76 mengawal selia keadaan apabila derma diterima oleh parti politik yang bertentangan dengan peruntukan Akta yang dicadangkan.
65. Fasal 77 memperuntukkan kuasa penyiasatan Suruhanjaya.



66. Fasal 78 memperuntukkan kuasa kepada Suruhanjaya untuk menggubal kaedah dan peraturan.
67. Fasal 79 dan Fasal 80 mengawal selia cara semakan semula atau rayuan yang boleh dikemukakan terhadap keputusan Suruhanjaya.
68. Fasal 81 dan Fasal 82 memperuntukkan mekanisme pelaporan untuk Suruhanjaya.

## BAHAGIAN VI

69. Bahagian VI membincangkan penalti bagi pelanggaran peruntukan Akta yang dicadangkan.
70. Fasal 83 memperuntukkan penalti bagi mana-mana orang menurut peruntukan Akta yang dicadangkan yang gagal memberikan Suruhanjaya apa-apa bukti atau dokumen.
71. Fasal 84 memperuntukkan hukuman am bagi orang atau parti politik yang melanggar peruntukan Akta yang dicadangkan.
72. Fasal 85 mengawal selia cara kesalahan yang dilakukan di luar Malaysia oleh mana-mana warganegara atau pemastautin tetap Malaysia atau syarikat yang dikawal oleh Malaysia, ditangani.

Diakui sebagai Terjemahan yang Sah daripada  
Dokumen yang dibekalkan oleh Pelanggan



Institut Terjemahan & Buku Malaysia

Institut Terjemahan & Buku Malaysia  
Wisma ITBM, No. 2, Jalan 2/27E,  
Seksyen 10, Wangsa Maju  
53300 Kuala Lumpur  
MALAYSIA  
www.itbm.com.my  
(276206D)

Disahkan bagi pihak ITBM  
Mohd Razali Jaffar  
Eksekutif Kanan

Tandatangan : .....  
No. Rujukan : INV-024463  
Tarikh : 06 MAY 2024